

## **CONSELLERÍA DA PRESIDENCIA, ADMINISTRACIÓNS PÚBLICAS E XUSTIZA.**

**Decreto \_\_/\_\_\_\_, de \_\_\_\_\_, polo que se crea e regula o rexistro profesional de socorrismo en instalacións acuáticas e espazos acuáticos naturais de Galicia.**

O artigo 24 da Lei 14/1986, do 25 de abril, xeral de sanidade, regula a intervención da Administración nas actividades públicas ou privadas que, directa ou indirectamente, poidan ter consecuencias negativas para a saúde.

O Decreto 103/2005, do 6 de maio, da Consellaría de Sanidade, polo que se establece a regulamentación técnico-sanitaria de piscinas de uso colectivo, regula as condicións hixiénico-sanitarias das piscinas de uso colectivo da Comunidade de Autónoma de Galicia e establece no seu artigo 29 en que casos estas piscinas deberán contar cun servizo de socorristas coa titulación e os niveis mínimos de formación.

A xestión dunha piscina cualificada de uso colectivo ou a organización de actividades nesta, sempre leva consigo o cumprimento dunha normativa de carácter sanitario que impón condicións de deseño, construción e funcionamento. Debe destacarse, entre elas, a obriga de contar con persoal de socorrismo de forma permanente mentres que a piscina permaneza aberta ao público ou se desenvolvan nela actividades, cuestión esta de especial importancia para as entidades locais xa que estas constitúen o principal grupo propietario das piscinas de uso colectivo de Galicia.

O artigo 25.2 da Lei 7/1985, do 2 de abril, reguladora das bases do réxime local, e o artigo 80 da Lei 5/1997, do 22 de xullo, de administración local de Galicia, nos seus apartados a) e h), atribúen aos municipios competencias para garantir a seguridade nos lugares públicos -entre os que se encontran as praias- e a protección da salubridade pública, nos termos que determine a lexislación estatal e autonómica. Estas atribucións competenciais deben ser consideradas á luz do disposto no artigo 2, apartados a) e b) da Lei 22/1988, do 28 de xullo, de costas, depositario dos fins que debe perseguir a administración pública na súa actuación sobre o dominio marítimo-terrestre. Estes fins son, entre outros, determinar o dominio marítimo-terrestre e asegurar a súa integridade e axeitada conservación, adoptando, se é o caso, as medidas de protección e restauración necesarias, así como garantir o uso público do mar, da súa ribeira e do resto do dominio público marítimo-terrestre, sen máis excepcións que as derivadas de razóns de interese público debidamente xustificadas. Así mesmo, o apartado d) do artigo 115 da Lei 22/1988, do 28 de xullo, de costas, establece que as competencias municipais, nos termos previstos pola lexislación que diten as Comunidades Autónomas, poderán abranguer vixiar a observancia das normas e instrucións ditadas pola Administración do Estado sobre salvamento e seguridade das vidas humanas.

O Decreto 7/2011, do 20 de xaneiro, polo que se establece a estrutura orgánica da Consellaría de Presidencia, Administracións Públicas e Xustiza, establece que este departamento da Xunta de Galicia se configura como un órgano de apoio e asistencia á Presidencia da Xunta de Galicia, ao que corresponde, entre outras e sen prexuízo das

demais competencias que legal e regulamentariamente teña atribuídas, a elaboración, proposta e execución da política do Goberno galego en materia de administración local e interior, que exercerá no nivel de desenvolvemento que se indica neste decreto para cada un dos órganos que integran este departamento.

A Academia Galega de Seguridade Pública é un organismo autónomo de carácter administrativo adscrito á Consellería de Presidencia, Administracións Públicas e Xustiza que se axustará nos seus fins, estrutura e funcionamento ao disposto na Lei 1/2007, do 15 de xaneiro, da Academia Galega de Seguridade Pública. De conformidade co establecido na devandita lei, a Academia Galega de Seguridade Pública orientará a súa actuación ao enriquecemento do capital humano dos servizos de seguridade pública mediante a súa capacitación a través da formación, a innovación e a excelencia, compromiso de xerar e transferir as bases de coñecemento para a mellora das políticas en materia de seguridade pública e impulso da calidade nos servizos de seguridade pública para unha mellor atención ao cidadán e maior satisfacción dos seus xestores.

Neste sentido, calquera regulación da formación dos socorristas en instalacións acuáticas e espazos naturais na Comunidade Autónoma de Galicia debe ter en conta as cualificacións profesionais e os certificados de profesionalidade publicados no Boletín Oficial do Estado.

O Real decreto 295/2004, do 20 de febreiro, modificado por Real decreto 1087/2005, de 16 de setembro e o Real decreto 1521/2007, do 16 de novembro, incorpora ao Catálogo nacional de cualificacións profesionais as cualificacións de Socorrismo en instalacións acuáticas e de Socorrismo en espazos acuáticos naturais e establece os seus correspondentes módulos formativos que se incorporan ao catálogo modular de formación profesional. Posteriormente, por medio do Real decreto 711/2011, do 20 de maio, establécense os certificados de profesionalidade asociados a estas cualificacións.

Como consecuencia do anterior, é obxecto do presente decreto a regulación dos niveis mínimos de formación cos que debe contar o persoal de socorrismo en instalacións acuáticas e espazos acuáticos naturais na Comunidade Autónoma de Galicia e a inscrición dos socorristas no Rexistro Profesional de Socorristas da Comunidade Autónoma de Galicia dependente da Academia Galega de Seguridade Pública, facendo especial fincapé na necesidade de que este persoal dispoña dunha habilitación profesional renovable periodicamente, xa que esta regulación é demandada pola cidadanía usuaria como garantía dunha axeitada prestación de servizos de calidade.

En virtude do exposto, por proposta do conselleiro de Presidencia, Administracións Públicas e Xustiza, e de acordo co ditame do Consello Consultivo de Galicia, facendo uso das atribucións conferidas pola Lei 1/1983, do 22 de febreiro, de normas reguladoras da Xunta e do seu Presidente, modificada polas leis 2/2007, de 28 de marzo, e 12/2007, de 27 de xullo, e previa deliberación do Consello da Xunta de Galicia na súa reunión de \_\_\_\_ de \_\_\_\_\_ de dous mil once,

## ***DISPOÑO:***

### **Artigo 1. Obxecto**

O presente decreto ten por obxecto regular a formación mínima que deberán reunir os socorristas acuáticos para o seu exercicio profesional no ámbito territorial da Comunidade Autónoma de Galicia e a obrigatoriedade da súa inscrición no Rexistro Profesional de Socorristas da Comunidade Autónoma de Galicia.

### **Artigo 2. Ámbito de aplicación**

Este decreto e as súas normas de desenvolvemento serán de aplicación aos socorristas que exerzan as súas actividades en instalacións acuáticas e/ou espazos acuáticos naturais de Galicia que, segundo a normativa vixente, teñan a obriga de ter un ou máis socorristas con titulación abondo en materia de salvamento e socorrismo acuático.

### **Artigo 3. Requisitos profesionais.**

Para o exercicio profesional do socorrismo acuático na Comunidade Autónoma de Galicia será necesario que o profesional figure inscrito no correspondente Rexistro Profesional de Socorristas Acuáticos de Galicia e dispoña da correspondente habilitación profesional.

As Administracións Públicas, os organismos públicos e as entidades privadas non poderán proceder á contratación de persoal profesionalmente dedicado ao socorrismo acuático no ámbito territorial da Comunidade Autónoma de Galicia que non se ache inscrito no citado rexistro.

### **Artigo 4. Rexistro Profesional de Socorristas Acuáticos.**

4.1. Créase o Rexistro Profesional de Socorristas Acuáticos da Comunidade Autónoma de Galicia, dependente da Academia Galega de Seguridade Pública, que terá por obxecto a inscrición dos socorristas acuáticos que presten os seus servizos no ámbito territorial da Comunidade Autónoma de Galicia.

4.2. A inscrición no devandito rexistro terá carácter obrigatorio e supoñerá a expedición dunha habilitación profesional.

4.3. O rexistro terá dúas seccións: Socorristas en instalacións acuáticas e Socorristas en espazos acuáticos naturais.

### **Artigo 5. Inscrición**

5.1. No Rexistro Profesional de Socorristas Acuáticos de Galicia figurarán aquelas persoas que o soliciten e acrediten estar en posesión da cualificación profesional de Socorrismo en instalacións acuáticas, aprobada polo Real decreto 295/2004, do 20 de febreiro (BOE do 9 de marzo de 2004) ou/e da cualificación profesional de Socorrismo en espazos acuáticos naturais, aprobada polo Real decreto 1521/2007, do 16 de outubro (BOE da 1 de decembro de 2007), dependendo do ámbito no que vaian desenvolver a súa actividade.

A acreditación da cualificación profesional de Socorrismo en instalacións acuáticas, que supoñerá a inscrición na sección Socorristas en instalacións acuáticas, poderá obterse por calquera das seguintes vías:

- A) Certificado de profesionalidade de Socorrismo en instalacións acuáticas (AFDP0109), establecido por Real decreto 711/2011, do 20 de maio.
- B) Título de Técnico Deportivo en Salvamento e Socorrismo establecido polo Real decreto 878/2011 de 24 de xuño, Título de Técnico Deportivo Superior en salvamento e Socorrismo establecido por Real decreto 879/2011, de 24 de xuño ou calquera outro título de grao medio ou superior de Formación Profesional que inclúa no seu currículo os módulos formativos asociados a todas as unidades de competencia da cualificación de Socorrismo en instalacións acuáticas do Catálogo Nacional de Cualificacións Profesionais.
- C) Acreditación de ter superado as catro unidades de competencia da cualificación profesional de Socorrismo en instalacións acuáticas, obtidas a través do procedemento, que desenvolva o Real decreto 1224/2009, do 17 de xullo, de recoñecemento das competencias profesionais adquiridas por experiencia laboral.

A acreditación da cualificación profesional de Socorrismo en espazos acuáticos naturais, que supoñerá a inscrición na sección Socorristas en espazos acuáticos naturais, poderá obterse por calquera das seguintes vías:

- A) Certificado de profesionalidade de Socorrismo en espazos acuáticos naturais (AFDP0209), establecido por Real decreto 711/2011 do 20 de maio.
- B) Título de Técnico Deportivo en Salvamento e Socorrismo establecido polo Real decreto 878/2011 do 24 de xuño, Título de Técnico Deportivo Superior en salvamento e Socorrismo establecido por Real decreto 879/2011, de 24 de xuño ou calquera outro título de grao medio ou superior de Formación Profesional que inclúa no seu currículo os módulos formativos asociados a todas as unidades de competencia da cualificación de Socorrismo en espazos acuáticos naturais do Catálogo Nacional de Cualificacións Profesionais.
- C) Acreditación de ter superado as catro unidades de competencia da cualificación profesional de Socorrismo en espazos naturais, obtidas a través do procedemento que desenvolva o Real decreto 1224/2009, do 17 de xullo, de recoñecemento das competencias profesionais adquiridas por experiencia laboral.

## **Artigo 6. Funcionamento do rexistro**

6.1. No funcionamento deste rexistro e acceso aos seus datos observaranse as normas establecidas pola Lei orgánica 15/1999 do 13 de decembro de protección de datos de carácter persoal, así como no Real decreto 994/1999, do 11 de xuño, polo que se aproba o Regulamento de medidas de seguridade que deben cumprir os ficheiros que conteñan os datos de carácter persoal e no artigo 37 da Lei 30/1992, do 26 de novembro, de réxime xurídico das administracións públicas e do procedemento administrativo común.

Os dereitos de acceso, rectificación e cancelación exercitaranse ante este rexistro conforme establece a normativa sobre protección de datos de carácter persoal.

6.2. No asento de inscrición deben constar, como mínimo, os seguintes datos:

- a) Nome, apelidos, número do documento nacional de identidade ou pasaporte do solicitante.
- b) Número rexistral.
- c) Data de inscrición na sección de Socorristas en instalacións acuáticas do Rexistro Profesional de Socorristas da Comunidade Autónoma de Galicia e/ou na sección de Socorristas en espazos acuáticos naturais do Rexistro Profesional de Socorristas Acuáticos da Comunidade Autónoma de Galicia.
- e) Descrición da acreditación sobre a base da que se procede á inscrición.
- f) Data de renovación da inscrición.

A rectificación e cancelación, no seu caso, dos asentos de inscrición practícaranse de oficio.

## **Artigo 7. - Renovación da inscrición como socorrista.**

7.1. A inscrición en cada unha das seccións do rexistro debe renovarse cunha periodicidade de cinco anos a partir da data da obtención da correspondente inscrición definitiva.

7.2. Para a renovación da inscrición definitiva, tanto o persoal socorrista en instalacións acuáticas (piscinas e instalacións acuáticas), coma o persoal socorrista en espazos acuáticos naturais (praias e augas interiores), da Comunidade Autónoma de Galicia, deberán actualizar cada catro anos a formación adquirida, mediante a acreditación da realización de cursos de formación continua dunha duración mínima de catro horas sobre cada un dos módulos teórico-prácticos asociados ás unidades de competencia, recollidos nos anexos I e/ou II do presente decreto.

## **Artigo 8. Solicitude de inscrición no Rexistro**

8.1. Os interesados deberán presentar a solicitude de inscrición ou a súa renovación segundo o modelo normalizado que figura como anexo III ao presente decreto, dirixida

á Dirección Xeral da Academia Galega de Seguridade Pública e acompañada da seguinte documentación:

- Fotocopia do DNI ou documento que acredite identidade ou autorización á AGASP para a consulta dos datos de identidade no sistema de verificación de datos de identidade, de conformidade co artigo 2 do Decreto 255/2008, do 23 de outubro e a orde dá Consellaría de Presidencia, Administracións Públicas e Xustiza, do 7 de xullo de 2009 que o desenvolve
- Dúas fotos tamaño carné
- Documentación xustificativa do cumprimento dos requisitos
- Documentación xustificativa do pagamento das taxas correspondentes

8.2. As solicitudes presentaranse no rexistro da Academia Galega de Seguridade Pública ou a través das formas previstas no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común ou a través da sede electrónica da Xunta de Galicia.

#### **Artigo 9. - Réxime de recursos.**

Contra a resolución da Dirección Xeral da Academia Galega de Seguridade Pública que decida sobre a procedencia ou non da inscrición inicial ou da renovación da inscrición, cabe a interposición dun recurso de alzada ante o conselleiro ou conselleira de Presidencia, Administracións Públicas e Xustiza conforme ás previsións da Lei 30/1992, do 26 de novembro, de réxime xurídico das administracións públicas e do procedemento administrativo común, e, así mesmo, contra a resolución deste último, poderá interpoñerse recurso contencioso administrativo de conformidade coas previsións contidas en Lei 29/1998, do 13 de xullo, reguladora da xurisdición contencioso-administrativa.

#### **Artigo 10. - Habilitación profesional.**

A inscrición inicial e futuras renovacións da inscrición no rexistro de socorristas dará dereito á expedición dunha habilitación profesional.

#### **Artigo 11. - Oferta formativa da AGASP.**

11.1. A AGASP, logo de acreditación pola Consellería competente en materia de laboral, poderá impartir os módulos formativos asociados ás unidades de competencia dos anexos I e II dos certificados de profesionalidade de Socorrismo en instalacións acuáticas (AFDP0109) e de Socorrismo en espazos acuáticos naturais (AFDP0209) establecidos por Real decreto 711/2011 do 20 de maio.

11.2. Os requisitos de acceso aos cursos así como as prescricións sobre formación e experiencia dos formadores e a estrutura e contido de cada módulo axustaranse ao establecido no Real decreto 711/2011 do 20 de maio.

11.3. A AGASP establecerá acordos con entidades públicas ou privadas para que os alumnos que superasen todos os módulos teóricos asociados ao certificado de profesionalidade de socorrismo en instalacións acuáticas ou ao certificado de profesionalidade de socorrismo en espazos acuáticos naturais poidan realizar as prácticas profesionais non laborais de socorrismo en instalacións acuáticas ou en espazos acuáticos naturais.

#### **Disposición transitoria única.**

A partir da entrada en vigor do presente decreto, e durante o período transitorio de 5 anos, que permita garantir a obtención por parte dos interesados da acreditación das unidades de competencia da cualificación profesional correspondente, poderán inscribirse de forma provisional no Rexistro Profesional de Socorristas de Galicia as persoas que, no momento da entrada en vigor desta normativa, cumpra algún dos seguintes requisitos:

- 1º.- Estar en posesión dun diploma que acredite a realización dun curso de 80 horas de formación de salvamento e socorrismo acuático impartido pola Academia Galega de Seguridade Pública con anterioridade á data de entrada en vigor do presente decreto.
- 2º.- Estar en posesión dun diploma que acredite a realización dun curso de formación en materia de socorrismo impartido pola Cruz Vermella, federacións deportivas de salvamento e socorrismo, universidades ou outras entidades con experiencia na formación de socorristas, con anterioridade á data de entrada en vigor do presente decreto, sempre que o devandito curso fose homologado pola Academia Galega de Seguridade Pública.

Aqueles cursos que estean en fase de desenvolvemento na data de publicación do presente decreto serán considerados para os efectos do establecido neste apartado, sempre que a entidade que organiza o curso o notifique á AGASP no prazo dun mes a contar dende o día seguinte a publicación.

A Academia Galega de Seguridade Pública utilizará como criterio de homologación que o curso teña un mínimo de 80 horas e un contido similar ao curso de salvamento e socorrismo acuático ofertado pola AGASP nos últimos anos.

- 3º.- Estar en posesión dun diploma que acredite a superación con avaliación positiva do "Curso de formación profesional para o emprego de socorrista acuático" (AFDB10, de 240 horas), expedido por unha Administración Pública competente en materia de formación profesional para o emprego.
- 4º.- Acreditar unha experiencia laboral superior a 12 meses. A devandita experiencia acreditarase mediante certificado de vida laboral acompañado de fotocopia compulsada de contrato de traballo ou certificación de empresa onde figuren a

duración dos períodos de prestación do contrato, as actividades desenvolvidas e o intervalo de tempo no que se realizaron as devanditas actividades.

A inscrición provisional dun socorrista practicarase nunha ou nas dúas seccións do rexistro, en función da formación e experiencia acreditadas.

Transcorridos cinco anos dende a entrada en vigor do decreto aqueles socorristas que fosen inscritos provisionalmente e que non acreditaran o cumprimento dos requisitos descritos no artigo 4 do decreto serán dados de baixa automaticamente.

**Disposición derogatoria única.**

Quedan derogadas cantas disposicións, de ámbito autonómico, de igual ou inferior rango, se opoñan ao presente decreto.

**Disposicións finais.**

**Primeira. Desenvolvemento normativo.**

Facúltase o conselleiro ou conselleira de Presidencia, Administracións Públicas e Xustiza para que dite cantas disposicións sexan precisas no ámbito das súas competencias para o desenvolvemento e execución do presente decreto, así como para a adecuación e modificación dos seus anexos.

**Segunda. Entrada en vigor.**

Este decreto entrará en vigor ao día seguinte da súa publicación no Diario Oficial das Galicia.

Santiago de Compostela, \_\_\_\_\_ de \_\_\_\_\_ de dous mil once.

Alberto Núñez Feijóo.

Presidente.

Alfonso Rueda Valenzuela.

Conselleiro de Presidencia, Administracións Públicas e Xustiza.



**ANEXO I**  
**MÓDULOS FORMATIVOS DO CERTIFICADO DE PROFESIONALIDADE**  
**SOCORRISMO EN INSTALACIÓNS ACUÁTICAS**  
**(PISCINAS E INSTALACIÓNS ACUÁTICAS)**

Código do módulo formativo	Denominación do módulo formativo	Asociado á unidade de competencia
MF0269_2	Natación	UC0269_2 Executar técnicas específicas de natación con eficacia e seguridade
MF0270_2	Prevenção de accidentes en instalacións acuáticas	UC0270_2 Previr accidentes ou situacións de emerxencia en instalacións acuáticas, velando pola seguridade dos usuarios
MF0271_2	Rescate de accidentados no medio acuático	UC0271_2 Rescatar persoas en caso de accidente ou situación de emerxencia en instalacións acuáticas
MF0272_2	Primeiros auxilios	UC0271_2 asistir como primeiro interviniente en caso de accidente ou situación de emerxencia
MP0186	Módulo de prácticas profesionais non laborais de socorrismo en instalacións acuáticas	Sen unidade de competencia asociada

Módulo formativo	Duración total en horas	N.º de horas máximas susceptibles de formación a distancia
MF0269_2: Natación	120	0
MF0270_2: Prevenção de accidentes en instalacións acuáticas	40	20
MF0271_2: Rescate de accidentados no medio acuático	90	30
MF0272_2: Primeiros auxilios	40	10
MP0186: Prácticas profesionais non laborais de socorrismo en instalacións acuáticas	80	0

**ANEXO II**  
**MÓDULOS FORMATIVOS DO CERTIFICADO DE PROFESIONALIDADE**  
**SOCORRISMO EN ESPAZOS ACUÁTICOS NATURAIS**  
**(PRAIAS E AUGAS INTERIORES)**

Código do módulo formativo	Denominación do módulo formativo	Asociado á unidade de competencia
MF0269_2	Natación	UC0269_2 Executar técnicas específicas de natación con eficacia e seguridade
MF1082_2	Prevenção de accidentes en espazos acuáticos naturais	UC0270_2 Previr accidentes ou situacións de emerxencia en espazos acuáticos naturais
MF1083_2	Rescate de accidentados en espazos acuáticos naturais	UC0271_2 Rescatar persoas en caso de accidente ou situación de emerxencia en espazos acuáticos naturais
MF0272_2	Primeiros auxilios	UC0271_2 asistir como primeiro interviniente en caso de accidente ou situación de emerxencia
MP0186	Módulo de prácticas profesionais non laborais de socorrismo en instalacións acuáticas	Sen unidade de competencia asociada

Módulo formativo	Duración total en horas	N.º de horas máximas susceptibles de formación a distancia
MF0269_2: Natación	120	0
MF0270_2: Prevenção de accidentes en espazos acuáticos naturais	60	20
MF0271_2: Rescate de accidentados en espazos acuáticos naturais	120	30
MF0272_2: Primeiros auxilios	40	10
MP0186: Prácticas profesionais non laborais de socorrismo en espazos acuáticos naturais	80	0

**ANEXO I**  
**MODELO NORMALIZADO DE SOLICITUDE PARA**  
**A INSCRICIÓN/RENOVACIÓN DA INSCRICIÓN**  
**NO REXISTRO DE SOCORRISTAS ACUÁTICOS DA COMUNIDADE**  
**AUTÓNOMA DE GALICIA**

PROCEDEMENTO <b>INSCRICIÓN NO REXISTRO OFICIAL DE SOCORRISTAS ACUÁTICOS DE GALICIA</b>	CÓDIGO DE PROCEDEMENTO  <b>MR 435 A</b>	DOCUMENTO  <b>SOLICITUDE</b>
---	--	------------------------------------

**DATOS DO INTERESADO**

NOME	APELIDOS
DNI/NIF	ENDEREZO
CONCELLO	PROVINCIA
CÓDIGO POSTAL	TELÉFONO
FAX	E-MAIL

**DATOS DO REPRESENTANTE**

NOME	APELIDOS
DNI/NIF	ENDEREZO
CONCELLO	PROVINCIA
CÓDIGO POSTAL	TELÉFONO
FAX	E-MAIL

**TIPO DE SOLICITUDE**

<input type="checkbox"/> NOVA INSCRICIÓN	<input type="checkbox"/> MODIFICACIÓN
<input type="checkbox"/> RENOVACIÓN	<input type="checkbox"/> CANCELACIÓN DA INSCRICIÓN

**SECCIÓN NA QUE SOLICITA O REXISTRO**

<input type="checkbox"/> SOCORRISTA EN INSTALACIÓNS ACUÁTICAS	<input type="checkbox"/> SOCORRISTA EN ESPAZOS ACUÁTICOS NATURAIS
---	---

**DOCUMENTACIÓN**

<input type="checkbox"/> Fotocopia do DNI ou documento que acredite identidade ou autorización á AGASP para a consulta dos datos de identidade no sistema de verificación de datos de identidade, de conformidade co artigo 2 do Decreto 255/2008, de 23 de outubro e a orde da Consellaría de Presidencia, Administracións Públicas e Xustiza, do 7 de xullo de 2009 que o desenvolve <input type="checkbox"/> Dúas fotos tamaño carné <input type="checkbox"/> Documentación xustificativa do cumprimento dos requisitos <input type="checkbox"/> Documentación xustificativa do pagamento das taxas
---

Autorizo a Academia Galega de Seguridade Pública, de conformidade co artigo 2 do Decreto 255/2008, de 23 de outubro e a orde da Consellaría de Presidencia, Administracións Públicas e Xustiza, do 7 de xullo de 2009 que o desenvolve, para a consulta dos meus datos de identidade no sistema de verificación de datos de identidade.

- SI  
 NO (neste caso, achegar documentación)

En cumprimento do disposto no artigo 5 da Lei orgánica 15/1999, de protección de datos de carácter persoal, infórmase de que os datos persoais recollidos nesta solicitude incorporaranse a un ficheiro, para o seu tratamento, coa finalidade da xestión deste procedemento. Vostede pode exercer os dereitos de acceso, rectificación, cancelación e oposición previstos na lei, mediante un escrito dirixido á Academia Galega de Seguridade Pública como responsable do ficheiro.

<p>LEXISLACIÓN APLICABLE</p> <p><b>Decreto / 2011</b> polo que se crea e regula o rexistro profesional de socorrismo en instalacións acuáticas e espazos acuáticos naturais de Galicia.</p>	<b>(Para encher pola Administración)</b>	
<p>FIRMA DO/DA SOLICITANTE OU PERSOA QUE O/A REPRESENTA</p> <p>_____ de _____ de _____</p> <p style="text-align: center;">(Localidade e data)</p>	<p>RECIBIDO</p>	<p>NÚMERO DE EXPEDIENTE</p> <p>_____</p> <p>DATA DE ENTRADA</p> <p>____/____/____</p> <p>DATA DE EFECTOS</p> <p>____/____/____</p> <p>DATA DE SAÍDA</p> <p>____/____/____</p>

Dirección Xeral da Academia Galega de Seguridade Pública